



Dieu enuoye d'autres playes sur Pharaon & les Egyptiens, mais leurs cœurs en sont endurcis.

PRES le Seigneur dit à Moÿse, Va vers Pharaon, luy denonçant que le Seigneur Dieu des Hebreux dit ainsi. Laisse aller mon peuple, afin qu'il me face sacrifice ; car si tu le retiens encores, peste sera sur tes champs, sur tes cheuaux, asnes, chameaux, brebis & bœufs, & le Seigneur effectuera demain ces choses. Ce qui aduint, & tout le bestial des Egyptiens mourut ; mais de celuy d'Israël n'en mourut vn seul : Dont Pharaon, bien qu'estonné, aggraua son cœur. Parquoy le Seigneur dit à Moÿse, & à Aaron, Prenez pleine vostre main de cendre de froment, & la iettez en l'air en presence de Pharaon, & vlcères & vessies enflées viendront sur les hommes, & bestes. Or les Deuins de Pharaon ne comparurent, pour estre pleins de rongne. Item, le Seigneur dit à Moÿse, Va à Pharaon, & luy dis, Laisse aller mon peuple, ou i'enuoyeray toutes mes playes en ton cœur, & de tes seruiteurs, & la peste exterminera le peuple de la terre : Que si encores tu empeschés le peuple d'aller sacrifier, demain seront éclairs, tonnerres & feu meslez en telle abondance, que ce qui sera aux champs, sera tout brisé : ce qui aduint sur Egypte seulement, & rien sur la terre de Gessen. Lors Pharaon dit à Moÿse, l'ay peché, le Seigneur est iuste ; mais moy & mon peuple sommes méchans. Et Moÿse fit cesser cette tempeste, mais Pharaon aggraua son cœur.

Exode Chap. 9.